

A implantación de novas explotacións e actividades extractivas así como a ampliación das existentes en calquera categoría de solo rústico especialmente protexido non poderán realizarse en tanto non sexa aprobado definitivamente o Plan sectorial de actividades extractivas de Galicia previsto no título III da Lei de ordenación da minaría de Galicia, que será formulado e tramitado polo conselleiro ou pola conselleira competente en materia de minas; todo isto sen prexuízo da posibilidade de outorgar licenza para actividades extractivas en solo rústico de protección ordinaria e de especial protección forestal, segundo o disposto polos artigos 36 e 37 desta lei».

*Terceira.-Aprobación das normas e dos plans previstos nesta lei.*

A Xunta de Galicia aprobará no prazo dun ano as normas de desenvolvemento precisas para a aplicación desta lei.

*Cuarta.-Desenvolvemento regulamentario.*

1. Autorízase a Xunta de Galicia para ditar as disposicións de aplicación e desenvolvemento desta lei.

2. Queda igualmente facultada a Xunta de Galicia para actualizar por decreto a contía das sancións fixadas nesta lei.

*Quinta.-Entrada en vigor.*

Esta lei entrará en vigor aos vinte días da súa publicación no *Diario Oficial de Galicia*.

Santiago de Compostela, vinte e tres de maio de dous mil oito.

Emilio Pérez Touriño  
Presidente

## CONSELLERÍA DE PRESIDENCIA, ADMINISTRACIÓN PÚBLICAS E XUSTIZA

*Orde do 30 de maio de 2008 pola que se desenvolve o Decreto 164/2005, do 16 de xuño, polo que se regulan e determinan as oficinas de rexistro propias ou concertadas da Administración da Comunidade Autónoma de Galicia, se crea o Rexistro Telemático da Xunta de Galicia e se regula a atención ao cidadán.*

O Decreto 164/2005, do 16 de xuño, crea o Rexistro Telemático da Xunta de Galicia, que permite a presentación por vía telemática de solicitudes, escritos e comunicacións. Esta orde inclúe no anexo VII do Decreto 164/2005, do 16 de xuño, un novo procedemento, co fin de continuar impulsando o emprego de técnicas e medios electrónicos, informáticos e tele-

máticos no desenvolvemento da actividade da Xunta de Galicia e no exercicio das súas competencias.

De conformidade co disposto no artigo 2.2º e a disposición adicional primeira b) e derradeira primeira do Decreto 164/2005, do 16 de xuño, polo que se regulan e determinan as oficinas de rexistro propias ou concertadas da Administración da Comunidade Autónoma de Galicia, se crea o Rexistro Telemático da Xunta de Galicia e se regula a atención ao cidadán,

### DISPOÑO:

Artigo único.

1. Inclúese no anexo VII do Decreto 164/2005, do 16 de xuño, e queda pois, habilitado cos efectos previstos no seu artigo 5.1º, o seguinte procedemento:

\* IN 842A Subvencións correspondentes a accións de comunicación e divulgación científica e tecnolóxica [Divercencia] no marco do Programa de comunicación e sensibilización social (CSS) do Plan Galego de Investigación, Desenvolvemento e Innovación Tecnolóxica (Incite).

2. O procedemento para a tramitación electrónica estará dispoñible no enderezo <http://www.xunta.es/servicios/>

### Disposición derradeira

Esta orde entrará en vigor o mesmo día da súa publicación no *Diario Oficial de Galicia*.

Santiago de Compostela, 30 de maio de 2008.

José Luis Méndez Romeu  
Conselleiro de Presidencia, Administracións  
Públicas e Xustiza

## CONSELLERÍA DE EDUCACIÓN E ORDENACIÓN UNIVERSITARIA

*Orde do 29 de maio de 2008 pola que se establece o procedemento para a implantación da xornada lectiva en sesión única de mañá ou mixta nas escolas de educación infantil, colexios de educación infantil e primaria, colexios rurais agrupados, centros públicos integrados, centros de educación especial e centros privados concertados.*

Tendo en conta a demanda dos centros da comunidade autónoma para que se lles autorice o cambio do tipo de xornada lectiva, parece procedente establecer un procedemento que sirva de canle para que aquelas comunidades educativas que así o desexen poidan solicitar a oportuna implantación da xornada lectiva en sesión única de mañá, ou ben unha xorna-

da mixta, cun mínimo de dúas tardes á semana, no marco dun proxecto educativo contextualizado no contorno e de acordo cos requisitos que se establecen, orientados a garantir o amplo consenso da comunidade educativa por unha banda e o desenvolvemento integral do alumnado por outra, sen que tal medida supoña incremento do gasto público na Consellería de Educación e Ordenación Universitaria.

Así mesmo, a Consellería de Educación e Ordenación Universitaria ve necesario determinar os requisitos exixibles para obter a modificación da xornada habitual dos anteditos centros.

Nesta liña, débese considerar a dispersión poboacional de Galicia, que produce que case a metade das rutas de transporte escolar existentes se concentren na nosa comunidade. Esta realidade fai imprescindible e determinante o informe do Servizo de Transportes á hora de considerar a viabilidade técnica e económica da modificación da xornada lectiva.

Polo anteriormente exposto,

#### DISPOÑO:

##### Primeiro.-*Obxecto e ámbito de aplicación.*

Esta orde regula os requisitos e o procedemento para a autorización nas escolas de educación infantil, colexios de educación infantil e primaria, colexios rurais agrupados, centros públicos integrados, centros de educación especial e centros privados concertados dependentes da Consellería de Educación e Ordenación Universitaria da implantación das seguintes xornadas lectivas:

a) En sesión única de mañá.

b) Nunha xornada mixta: posibilitaranse outras xornadas, cun mínimo de dúas tardes á semana, mantendo un total de 25 horas semanais.

##### Segundo.-*Requisitos.*

a) En sesión única de mañá:

1. Acordo do consello escolar, por maioría dos tres quintos dos seus membros.

2. Acordo do claustro de profesores e profesoras, por maioría dos tres quintos dos seus membros.

3. Informe favorable do Servizo de Transportes da delegación provincial, conforme o previsto na epígrafe sétima desta orde, cando o centro docente teña transporte escolar.

4. Acordo favorable do 58% do total do censo das nais, pais ou titores legais do alumnado. Para os efectos de establecer o total do censo, computaranse a nai ou o pai ou un dos titores legais do alumnado da etapa en que se pretende cambiar a xornada.

5. Plan específico de actividades extraescolares.

b) Nunha xornada mixta:

1. Acordo do consello escolar, por maioría dos tres quintos dos seus membros.

2. Acordo do claustro de profesores e profesoras, por maioría dos tres quintos dos seus membros.

3. Informe favorable do Servizo de Transportes da delegación provincial, conforme o previsto na epígrafe sétima desta orde, cando o centro docente teña transporte escolar.

4. Acordo favorable da maioría absoluta do total do censo das nais, pais ou titores legais do alumnado. Para os efectos de establecer o total do censo computaranse o pai ou a nai ou un dos titores legais do alumnado da etapa en que se pretende cambiar a xornada.

5. Plan específico de actividades extraescolares.

##### Terceiro.-*Plan específico de actividades extraescolares.*

Os centros presentarán un plan específico de actividades extraescolares que se desenvolverán pola tarde, sen prexuízo das que se inclúan na programación xeral anual segundo o establecido no capítulo IX do anexo á Orde do 22 de xullo de 1997. Neste plan específico de actividades preverase o modo de colaboración nelas das asociacións de nais e pais do alumnado, doutras institucións e organismos, e, de ser o caso, do profesorado, sinalando o órgano responsable da organización e financiamento de cada actividade, así como a participación económica do alumnado, se for o caso.

Con independencia da participación ou non do profesorado na organización e desenvolvemento das actividades extraescolares, nos horarios do profesorado estableceranse pola tarde dúas horas complementarias fixas para garantir a coordinación do profesorado a través das reunións de departamento, equipos de ciclo e, se é o caso, de nivel e as titorías dos pais, ademais de quendas de supervisión das devanditas actividades extraescolares.

O plan específico de actividades extraescolares será elaborado polo equipo directivo, coa colaboración da persoa responsable das actividades extraescolares, e será aprobado polo consello escolar dentro da programación xeral anual do centro.

##### Cuarto.-*Fase de información.*

Coa finalidade de garantir o máximo coñecemento do plan específico de actividades extraescolares por parte dos distintos sectores da comunidade educativa e moi especialmente polas nais e pais do alumnado, os centros educativos organizarán unha fase de información sobre o devandito plan cun mes de antelación á realización das votacións do sector de pais, nais ou titores legais.

##### Quinto.-*Votacións.*

As votacións correspondentes ao consello escolar e ao claustro de profesorado terán lugar en sesións extraordinarias convocadas para o efecto. Desenvol-

veranse en cada caso ante unha mesa composta pola dirección do centro como presidente ou presidenta e dous membros do órgano correspondente designados por sorteo no mesmo acto.

A votación para o sector das nais, pais ou titores legais do alumnado farase, logo da convocatoria pola dirección do centro, ante unha mesa constituída para o efecto e composta pola dirección do centro, que a presidirá, e dúas nais, pais ou titores legais, designados por sorteo público, actuando como secretaria ou secretario a persoa de menor idade. En previsión de posibles ausencias, no sorteo designaranse titulares e suplentes.

O censo electoral deberá expoñerse no taboleiro de anuncios do centro con dez (10) días, polo menos, de anticipación á data fixada para a xornada electoral. As direccións dos centros educativos abrirán un prazo de, polo menos, cinco días hábiles para que as nais, pais ou titores legais poidan presentar reclamacións ao censo.

A votación do sector de pais, nais ou titores legais realizarase no centro educativo, nunha única xornada cunha duración establecida pola dirección do centro e que non será inferior a oito horas.

O voto será, en todo caso, directo, secreto e non delegable. No sector das nais e pais poderán votar a nai ou o pai ou un dos titores legais.

#### Sexto.-*Tramitación da solicitude.*

As direccións dos centros educativos que cumpran os correspondentes requisitos establecidos na disposición segunda efectuarán solicitude ao titular da delegación provincial da Consellería de Educación e Ordenación Universitaria durante o mes de febreiro.

Xunto coa solicitude achegarán as actas das votacións levadas a cabo nos órganos colexiados do centro e do sector das nais, pais ou titores legais, ás cales se refire a epígrafe anterior, e, se é o caso, o informe favorable do Servizo de Transportes da correspondente delegación provincial da Consellería de Educación e Ordenación Universitaria.

#### Sétimo.-*Centros con transporte escolar.*

Despois das votacións do consello escolar e do claustro de profesorado e con carácter previo ás votacións das nais, pais ou titores legais, as direccións dos centros con transporte escolar solicitarán ao Servizo de Transportes da delegación provincial da Consellería de Educación e Ordenación Universitaria un informe referido á viabilidade ou non do horario proposto polo centro solicitante, en relación cos servizos complementarios de transporte e comedor.

O informe do Servizo de Transportes será favorable cando a modificación horaria proposta polo centro non supoña incremento de custo tanto do transporte como do comedor escolar.

Se o informe emitido polo Servizo de Transportes é favorable, o centro procederá a convocar e realizar

as votacións das nais, pais ou titores legais conforme o previsto nesta orde. No suposto de que o informe fose desfavorable, o centro educativo procederá ao arquivo das actuacións.

#### Oitavo.-*Informe da inspección educativa.*

Á vista da documentación presentada polo centro educativo, o Servizo provincial de Inspección Educativa emitirá informe sobre o cumprimento dos requisitos e demais trámites establecidos nesta orde, e se o horario cumpre ou se adapta á normativa legal vixente.

#### Noveno.-*Proposta de resolución.*

O titular da delegación provincial da Consellería de Educación e Ordenación Universitaria, á vista dos informes sinalados e doutros que puidese solicitar, proporalle á Dirección Xeral de Ordenación e Innovación Educativa a resolución que proceda, achegando, así mesmo, o expediente completo de cada centro solicitante.

#### Décimo.-*Modificación.*

A xornada aprobada non poderá ser modificada nun período de tres anos académicos.

#### Décimo primeiro.-*Revogación da autorización.*

Poderase revogar a autorización en calquera momento do ano académico, por proposta da delegación provincial e logo de audiencia do consello escolar do centro, cando no seguimento realizado polo servizo provincial de Inspección Educativa se comprobe o incumprimento grave do plan de actividades extraescolares que serviu de base á autorización.

#### *Disposición transitoria*

Primeira.-Para o curso 2008/2009, os centros poderán solicitar no mes de xuño a implantación da xornada lectiva en sesión única de mañá ou unha xornada mixta ao abeiro desta orde.

Segunda.-Para centros que contén con autorización para xornada lectiva en sesión única de mañá concedida por implantación ou prórroga, ou mixta con carácter experimental para o curso escolar 2008/2009, esta será considerada definitiva e seralles de aplicación o punto décimo.

#### *Disposición derogatoria*

Queda derogada a Orde do 13 de abril de 1993 pola que se establece o procedemento para a implantación da xornada lectiva en sesión única de mañá nos centros de educación infantil, educación primaria e educación xeral básica e todas as disposicións de igual e inferior rango que se opoñan ao establecido nesta orde.

#### *Disposicións derradeiras*

Primeira.-Autorízase a Dirección Xeral de Ordenación e Innovación Educativa para ditar as disposicións oportunas no desenvolvemento desta orde.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 29 de maio de 2008.

Laura Sánchez Piñón  
Conselleira de Educación e Ordenación  
Universitaria

## CONSELLERÍA DE SANIDADE

*Orde do 26 de maio de 2008 pola que se crea o Rexistro Oficial de Establecementos e Servizos Biocidas, e se establecen as bases para a inscrición neste e o seu funcionamento na Comunidade Autónoma de Galicia.*

A Lei 14/1986, do 25 de abril, xeral de sanidade, dispón no seu artigo 25.1º que a existencia de autorizacións sanitarias, así como a obriga de someter a rexistro por razóns sanitarias as empresas ou os produtos, serán establecidas regulamentariamente.

O Real decreto 1054/2002, do 11 de outubro, polo que se regula o proceso de avaliación para o rexistro, autorización e comercialización de biocidas, dispón no seu artigo 27 que os locais ou instalacións onde se fabriquen e/ou formulen biocidas, así como os que almacenen e/ou comercialicen biocidas autorizados para uso profesional e as empresas de servizos biocidas que así se determinen regulamentariamente, deberán inscribirse no Rexistro Oficial de Establecementos e Servizos Biocidas de cada comunidade autónoma, que será xestionado pola autoridade sanitaria competente.

A Orde SCO/3269/2006, do 13 de outubro, pola que se establecen as bases para a inscrición e o funcionamento do Rexistro Oficial de Establecementos e Servizos Biocidas, e se establecen as normas reguladoras do dito rexistro, adecúa á nova lexislación de produtos biocidas a Orde do 24 de febreiro de 1993, pola que se normaliza a inscrición neste e o funcionamento do Rexistro Oficial de Establecementos e Servizos Praguicidas.

Por todo iso, faise necesario adecuar á nova lexislación de produtos biocidas, a Orde do 8 de abril de 1996, conxunta das consellerías de Agricultura, Gandería e Montes e de Sanidade e Servizos Sociais, pola que se crea o Rexistro Oficial de Establecementos e Servizos Praguicidas e se crean normas para a inscrición neste na Comunidade Autónoma de Galicia.

A finalidade desta orde é establecer as condicións e requisitos mínimos para a inscrición, estrutura e funcionamento do Rexistro Oficial de Establecementos e Servizos Biocidas na Comunidade Autónoma de Galicia, con obxecto de facilitar o control oficial destas actividades, sen obstaculizar a libre circulación das ditas empresas e servizos en todo o territorio nacional.

Ao abeiro do Real decreto 1634/1980, do 31 de xullo, de transferencias de competencias da Administración do Estado á Xunta de Galicia en materia, entre outras de sanidade, e por proposta da Dirección Xeral de Saúde Pública da Consellería de Sanidade,

### DISPOÑO:

Artigo 1º.-*Obxectivo e ámbito de aplicación.*

1. Pola presente orde regúlase o Rexistro Oficial de Establecementos e Servizos Biocidas da Comunidade Autónoma de Galicia (no sucesivo rexistro).

2. Establécense as condicións e requisitos básicos para a inscrición, estrutura e funcionamento deste.

3. Esta orde será de aplicación aos establecementos e servizos biocidas definidos no artigo 2º e que traballen, como mínimo, con algún dos tipos de biocidas que figuran no anexo I.

4. Quedan excluídos do ámbito de aplicación desta orde:

a) Os establecementos nos que se comercialicen exclusivamente biocidas que figuren inscritos no Rexistro Oficial de Biocidas para uso polo público en xeral ou para a hixiene humana.

b) Os establecementos nos que se fabriquen, formulen, manipulen, almacenen ou comercialicen desinfectantes de material clínico, farmacéutico ou de ambiente clínico, cirúrxico ou praguicidas de uso na hixiene persoal.

c) Os servizos biocidas de carácter corporativo que actúen exclusivamente en prevención e control da lexiónelose, en aplicación do disposto no artigo 13 do Real decreto 865/2003, do 4 de xullo, polo que se establecen os criterios hixiénico-sanitarios para a prevención e control da lexiónelose.

Artigo 2º.-*Definicións.*

Para os efectos desta orde enténdese por:

a) Almacenamento: actividade exclusiva de provisión de produtos biocidas nun local de titularidade propia, alugado ou cedido.

b) Biocidas: as substancias activas e preparados que conteñan unha ou máis substancias activas, presentados na forma en que son subministrados ao usuario, destinados a destruír, contrarrestar, neutralizar, impedir a acción ou exercer un control doutro tipo sobre calquera organismo nocivo por medios químicos ou biolóxicos, de acordo co artigo 2 do Real decreto 1054/2002, do 11 de outubro.

c) Carácter corporativo: tratamentos que se realizan por persoal propio pertencente a entidades cuxos espazos, locais, instalacións ou transportes sexan de uso público. Non se inclúen os tratamentos realizados nun único establecemento por persoal propio nas súas funcións de mantemento.

d) Comercialización: a subministración ou posta á disposición de terceiros de produtos biocidas con ou sen titularidade sobre estes, a título oneroso ou grauíto, incluída a venda polo miúdo, dentro do territorio nacional.

A importación ou exportación de biocidas ao territorio aduaneiro da Unión Europea considérase para todos os efectos comercialización.